



МОНГОЛ УЛСЫН
ХОТ БАЙГУУЛАЛТ, БАРИЛГА,
ОРОН СУУЦЖУУЛАЛТЫН САЙДЫН
ТУШААЛ

2025 оны 02 сарын 21 өдөр

Дугаар 44

Улаанбаатар хот

Журам шинэчлэн батлах тухай

Монгол Улсын Засгийн газрын тухай хуулийн 24 дүгээр зүйлийн 2 дахь хэсэг, Монгол Улсын яамны эрх зүйн байдлын тухай хуулийн 26 дугаар зүйлийн 26.3, хэсэг, Засгийн газрын 2019 оны 5 дугаар тогтоолын 2 дугаар хавсралтаар баталсан “Засгийн газрын салбарын тэргүүний ажилтан” хүндэт тэмдгийн төрөл, түүнийг олгох эрх бүхий албан тушаалтны жагсаалтын 13, 22-т заасныг тус тус үндэслэн ТУШААХ нь:

1. “Хот байгуулалт, барилга, орон сууцжуулалтын яамны шагнал олгох журам”-ыг хавсралт ёсоор баталсугай.

2. “Тэргүүний барилгачин”, “Нийтийн аж ахуйн тэргүүний ажилтан” хүндэт цолны тэмдэг, үнэмлэхийн хавтас, “Жуух бичиг”-ийн хавтас хийлгэх зардлыг жил бүрийн төсөвтөө тусгаж шийдвэрлэхийг “Барилгын хөгжлийн төв” ТӨААТҮГ-ын захирал (Т.Пүрэвхатан)-д үүрэг болгосугай.

3. Энэ тушаалын хавсралтаар баталсан журмын хэрэгжилтэд хяналт тавьж ажиллахыг Төрийн захиргааны удирдлагын газар (С.Батзаяа)-т даалгасугай.

4. Энэ тушаал гарсантай холбогдуулан “Журам шинэчлэн батлах тухай” Барилга, хот байгуулалтын сайдын 2022 оны 01 дүгээр сарын 26-ны өдрийн 21 дүгээр тушаалыг хүчингүй болсонд тооцсугай.

Ж.БАТСУУРЬ

1525010138

Хот байгуулалт, барилга, орон сууцжуулалтын Сайдын
8025 оны 02 сарын 21 өдрийн 14 дугаар тушаалын хавсралт

ХОТ БАЙГУУЛАЛТ, БАРИЛГА, ОРОН СУУЦЖУУЛАЛТЫН ЯАМНЫ ШАГНАЛ ОЛГОХ ЖУРАМ

Нэг. Нийтлэг үндэслэл

1.1. “Засгийн газрын салбарын тэргүүний ажилтан” хүндэт тэмдэг болон Хот байгуулалт, барилга, орон сууцжуулалтын яамны шагналд нэр дэвшүүлэх, тодорхойлох, олгохтой холбогдсон харилцааг энэ журмаар зохицуулна.

1.2. “Засгийн газрын салбарын тэргүүний ажилтан” хүндэт тэмдэг болон Хот байгуулалт, барилга, орон сууцжуулалтын яамны шагналын зорилго нь Монгол Улсын хот байгуулалт, барилга, орон сууц, нийтийн аж ахуй, инженерийн дэд бүтцийн салбарын ажилтнуудын хөдөлмөр зүтгэл, гаргасан амжилт, үр бүтээлийг үнэлэх, тэдний идэвх санаачилгыг дэмжиж, сайшаан урамшуулахад оршино.

1.3. Шагналыг олгохдоо тус салбарын ажилтны ажлын ололт амжилт, үр бүтээл, тус салбарт ажилласан хугацааг гол шалгуур болгохын зэрэгцээ тухайн ажилтны ажилладаг байгууллагын бүтээн байгуулалт, ажлын үр дүнг харгалзан үзэх зарчмыг баримтална.

Хоёр. Шагналын төрөл

2.1. “Засгийн газрын салбарын тэргүүний ажилтан” хүндэт тэмдэг болон Хот байгуулалт, барилга, орон сууцжуулалтын яамны шагнал дараах төрөлтэй байна:

2.1.1. “Тэргүүний барилгачин” хүндэт тэмдэг;

2.1.2. “Нийтийн аж ахуйн тэргүүний ажилтан” хүндэт тэмдэг;

2.1.3. Хот байгуулалт, барилга, орон сууцжуулалтын яамны “Жуух бичиг”;

2.1.4. Хот байгуулалт, барилга, орон сууцжуулалтын яамны “Хүндэт дэвтэр”.

Гурав. Шагнал олгох ерөнхий нөхцөл

3.1. Шагналыг яам, Засгийн газар гэсэн дарааллаар дор дурдсан үзүүлэлтийг хангасан албан хаагч, иргэнд олгоно:

3.1.1. Хот байгуулалт, барилга, орон сууцжуулалтын яамны “Жуух бичиг”-ээр тухайн салбартаа 5-аас доошгүй жил үр бүтээл, идэвхи санаачлагатай ажиллаж, ажил үйлсээрээ хамт олноо манлайлсан яам, харьяа байгууллагын албан хаагч, хот байгуулалт, төлөвлөлт, архитектур, барилга байгууламжийн зураг төсөл, барилга угсралт, засвар шинэчлэлт, барилгын материалын үйлдвэрлэл, орон сууц,

нийтийн аж ахуй, инженерийн байгууламжын ажил үйлчилгээ эрхэлдэг байгууллагын ажилтан, албан хаагч, мэргэжлийн холбоо, төрийн бус байгууллага, салбарын мэргэжлийн боловсон хүчин бэлтгэдэг сургуулийн багш, эрдэмтэн, эрдэм шинжилгээний ажилтан, болон бусад;

3.1.2. **“Тэргүүний барилгачин”** хүндэт тэмдгээр тухайн салбартаа 10-аас доошгүй жил үр бүтээл, идэвхи санаачлагатай ажиллаж, ажил үйлсээрээ хамт олноо манлайлсан яам, агентлаг, харьяа байгууллагын албан хаагч, хот байгуулалт, төлөвлөлт, архитектур, барилга байгууламжийн зураг төсөл, барилга угсралт, засвар шинэчлэлт, барилгын материалын үйлдвэрлэл, мэргэжлийн холбоо, төрийн бус байгууллагын мэргэжилтэй ажилтан, албан хаагч, салбарын мэргэжлийн боловсон хүчин бэлтгэдэг сургуулийн багш, эрдэмтэн, эрдэм шинжилгээний ажилтан, болон холбогдох бусад;

3.1.3. **“Нийтийн аж ахуйн тэргүүний ажилтан”** хүндэт тэмдгээр тухайн салбартаа 10-аас доошгүй жил үр бүтээл, идэвхи санаачлагатай ажиллаж, ажил үйлсээрээ хамт олноо манлайлсан яам, агентлаг, харьяа байгууллагын албан хаагч, орон сууц, нийтийн аж ахуй, инженерийн шугам сүлжээ, дэд бүтэцийн ашиглалт үйлчилгээ эрхэлдэг байгууллагын ажилтан, албан хаагч, мэргэжлийн холбоо, төрийн бус байгууллагын мэргэжилтэй ажилтан, албан хаагч, салбарын мэргэжлийн боловсон хүчин бэлтгэдэг сургуулийн багш, эрдэмтэн, эрдэм шинжилгээний ажилтан болон холбогдох бусад;

3.1.4. Хот байгуулалт, барилга, орон сууцжуулалтын яамны **“ХҮНДЭТ ДЭВТЭР”**-т салбартаа 40-өөс дээш жил ажиллаж, салбарын хөгжилд бодитой хувь нэмэр оруулж, хөдөлмөрийн өндөр амжилт, үр бүтээл гаргасан ахмад ажилтан болон салбарт онцгой гавьяа байгуулсан хүний алдар гавьяа, сайн үйлс, үлгэр дуурайллыг алдаршуулж, алдар нэрийг нь мөнхжүүлэн бичиж үлдээнэ. Хүндэт дэвтэрт бичигдсэн тухай гэрчилгээ олгоно. Хүндэт дэвтэрт бичигдэх ажилтан салбарын тэргүүний ажилтан тэмдгээр шагнагдсан байна.

3.2. Тухайн салбарыг хөгжүүлэх үйл хэрэгт онцгой амжилт, шинэ санаачлага, бүтээл гаргасан, улс орны хэмжээний нээлт хийж, улс нийгэмд тодорхой ашиг тус өгсөн иргэнийг 3.1.1-3.1.3-т заасан хугацааг харгалзахгүйгээр шагнаж, урамшуулж болно.

3.3. Шагналыг шатлан ахих журмаар олгох бөгөөд шагнагдсанаас хойш 3-аас доошгүй жил тогтвортой ажиллаж, ажлын амжилт, үр бүтээл нь өмнөх түвшингээс ахисан нөхцөлд дараагийн шатны шагналд нэр дэвшүүлж тодорхойлно.

Дөрөв. Шагналд нэр дэвшүүлэх, түүнийг хүлээн авах

4.1. Төрийн албан хаагчийг тухайн байгууллагын удирдлага нэр дэвшүүлж, хамт олны хурлаар хэлэлцүүлэн, тодорхойлно.

4.2. Салбарын чиглэлээр үйл ажиллагаа явуулдаг аж ахуйн нэгж, байгууллагын ажилтан болон тухайн байгууллагаас өндөр насны тэтгэвэрт гарсан ахмад ажилтныг одоо ажиллаж байгаа болон хамгийн сүүлд ажиллаж байсан байгууллага, аж ахуйн нэгж нь шагналд тодорхойлно.

4.3. Аль нэг байгууллага, аж ахуйн нэгжид харьяалалгүй ахмад болон хувиараа хөдөлмөр эрхэлдэг иргэн, ахмад настныг оршин сууж буй аймаг, дүүргийн Засаг дарга тодорхойлж болно.

4.4. Үндэсний хэмжээнд үйл ажиллагаа эрхэлж байгаа төрийн бус байгууллага, мэргэжлийн холбоод нь гишүүн байгууллагын шагналын хүсэлтийг нэгдсэн журмаар авч саналаа ирүүлнэ.

4.5. Монгол Улсын хот байгуулалт, барилга, орон сууцжуулалт, нийтийн аж ахуйн салбарын хөгжилд онцгой амжилт гаргаж бодитой дэмжлэг туслалцаа үзүүлсэн гадаадын иргэнийг дээрх шагналаар шагнаан урамшуулж болно.

4.6. Шагналд нэр дэвшигчийг тодорхойлохдоо дор дурдсан баримт бичгийг бүрдүүлнэ:

4.6.1. Шагнуулах тухай үндсэн байгууллагын хүсэлт, албан тоот;

4.6.2. Шагналд нэр дэвшигчийн анкет /Маягт 1/;

4.6.3. Байгууллагын удирдах ажилтны баталгаажуулсан ажил байдлын тодорхойлолт;

4.6.4. Хамт олны хурлаар хэлэлцсэн тэмдэглэл;

4.6.5. Онцгой амжилт гаргасан бол түүнийг гэрчлэх баримт бичиг;

4.7. Тэмдэглэлт баяр болохоос 30-аас доошгүй хоногийн өмнө шагналын материалыг цахимаар хүлээн авна.

4.10. Шагналд нэр дэвшигчийн холбогдох мэдээллийг хуурамчаар бүрдүүлсэн нь нотлогдвол тухайн байгууллагын эрхийг 1 жилээр хязгаарлаж, уг хугацаанд шагнал олгохгүй.

Тав. Шагналыг шийдвэрлэх, олгох

5.1. Шагналыг дараах нийтээр тэмдэглэх баярын болон тэмдэглэлт өдрүүдийг тохиолдуулан олгоно:

5.1.1. Үндэсний их баяр наадам;

5.1.2. Шинэ жил;

5.1.3. Салбарын зарим ажил, мэргэжлийн ажилтны тэмдэглэлт өдөр буюу Барилгын салбар үүсч хөгжсөний баярын өдөр, Нийтийн аж ахуйн салбар үүсч хөгжсөний баярын өдөр;

5.2. “Засгийн газрын салбарын тэргүүний ажилтан” хүндэт тэмдэг, яамны “Жуух бичиг”-ийг байгууллагын ой болон насны ойг тохиолдуулан олгохгүй.

5.3. Шагналын асуудал хариуцсан албан хаагч шагналын материалыг хүлээн авч хянаж, яамны удирдлагад танилцуулна.

5.4. Шагналын асуудал хариуцсан албан хаагч шагналд тодорхойлсон хүсэлтийг хүлээн авч энэ журамд заасан үзүүлэлт, шаардлагыг хангасан ажилтан, албан хаагчийг шагнах тухай шийдвэрийн төсөл боловсруулж, Хот байгуулалт, барилга, орон сууцжуулалтын сайдын тушаалаар батлуулж, олгоно.

5.5. Хувийн дугаар бүхий “Засгийн газрын салбарын тэргүүний ажилтан”-ны үнэмлэх болон яамны “Жуух бичиг” дээр зөвхөн Засгийн газрын гишүүн, сайд гарын үсэг зурж баталгаажуулна.

5.6. Шагналыг тодорхойлсон аж ахуйн нэгж, байгууллагын эрх бүхий албан тушаалтанд хүлээлгэн өгнө.

Зургаа. Хүндэт тэмдэг, үнэмлэх нөхөн болон сольж олгох

6.1. “Засгийн газрын салбарын тэргүүний ажилтан” хүндэт тэмдэг, үнэмлэх болон яамны “Жуух бичиг”-ийг үрэгдүүлсэн буюу гэмтээсэн тохиолдолд нөхөн болон сольж олгож болох ба дараах баримт бичгийг бүрдүүлэн Хот байгуулалт, барилга, орон сууцжуулалтын яамны Төрийн захиргааны удирдлагын газарт хүсэлтээ гаргана:

6.1.1. Тэмдэг, үнэмлэхийг үрэгдүүлсэн, эвдэж гэмтээсэн нөхцөл шалтгааныг тодорхой бичсэн өргөдөл;

6.1.2. Иргэний үнэмлэхийн хуулбар;

6.1.3. Мөнгөн хураамж.

6.2. Шагналын асуудал хариуцсан албан хаагч өргөдлийг хянаад, нөхөн болон сольж олгох үндэслэлтэй гэж үзвэл “Засгийн газрын салбарын тэргүүний ажилтан” хүндэт тэмдэг, үнэмлэх нөхөн олгоход шаардагдах 50.000 /тавин мянга/ төгрөг, “Жуух бичиг” нөхөн олгоход шаардагдах 20.000 /хорин мянга/ төгрөгийн төлбөрийг холбогдох байгууллага, иргэнээс гаргуулж, байгууллагын дансанд шилжүүлсний дараа олгож болно.